

龍巖州志

卷十二人物上

龍巖州志卷之十二

人物志上

詩曰雖無老成人尙有典型人物爲志乘所重非特以光簡牘也亦使後人生則儆之思焉巖自有宋以來人材輩出自理學醇儒名臣顯宦與夫忠孝節義及鄉邑一行之善足以表見當時垂示後世者今豈異於古所云耶茲悉照乾隆三年張志而續載之閱世生人閱人成世亦考鏡得失之資也若夫爰及閨幃並足輝增彤管抑又風化攸關歟志人物理學列傳

陳眞晟字晦德改字剩夫本鎮海衛人以布衣自號學者稱爲

龍巖州志

卷十二

人物志上

一

布衣先生骨格高聳神氣肅清弱冠卽自拔於俗入武安山中從進士唐泰學赴省試以有司防察過嚴無待士禮遂絕意科舉專志正學初讀朱子大學或問知敬乃大學之基及見程子以主一釋敬以無適釋一始於敬見得親切其學在推尋心之動靜而務主於一嘗語人曰大學誠意章爲鉄門關最難過主一二字乃其玉鑰匙也又曰人於此學若眞知之則行在其中矣天順三年詣闕上程朱正學纂要先疏乞召見面陳其說不報及書上得旨看詳以聞時侍郎鄒幹掌部事漫不知其說云何事竟寢已而家居讀英宗頒行勅諭條教喜曰此學校正教也因採勅諭中要語參以程氏學制

呂氏鄉約朱氏貢舉私議作正教正考會通又纂長書告當道皆不能推行其說具詳崇祀理學真儒疏見藝文嗣聞臨川吳聘君名欲往質之抵豫章太史張元禎禮遇之扣其學所得大加稱許曰禎敢僭謂斯道自程朱以來惟先生得其真吳許二子亦未是如聘君者不可見亦不必見也遂歸鎮海與莆人李文舉諸先輩講行文公學約而風俗爲之一正尋遷於龍巖會漳平新設縣教席缺當道以禮聘署教事卽以程朱學爲教士化之晚年居於漳之玉洲卒年六十有四後十年學道周孟中祭以文知府彭桓立石以表之題曰大明闕下兩上書請補正學泉南布衣陳先生墓又三十年學道

姚鏞知府陳洪謨舉入鄉賢祠嘉靖辛卯海鹽徐咸編入理學名臣錄龍巖禮科給事石應岳疏請專祠祀於巖額曰正學布衣平日不爲文字之學僅有布衣存稿刊行於世

曾汝檀字維馨漳平縣和睦里人以貢入南雍受學於湛甘泉登嘉靖壬辰進士授都察院都事時甘泉爲禮部侍郎朝夕親炙學日益明及甘泉轉南京禮部尙書檀亦求改南以就問學遷南戶部員外郎歷禮部郎中擢知撫州府首建陸象山吳草廬吳康齋三賢祠以爲民表又建五經閣政暇卽與諸生講明實學亶亶不倦嗣調南寧道出嶺南時甘泉已家居檀往訪焉治南寧士民歸心時安南內亂貢愆期廷議屢

勅行勘而藩臬難其事檀毅然請行至安南關上勘明以聞未幾疏乞終養南寧人奔走送者莫不流涕歸經嶺南復謁甘泉於天關精舍半月而歸抵家惟以養親講學爲事與諸生論經旨但遇舊說分析太過處必爲渾合使知歸一常以中庸戒懼慎獨教人曰中庸揭此獨知爲後學開一門路多少緊切譬如種植必有真種子落地然後培植日加暢茂矣於是四方來學者衆乃構心源精舍爲講所丁父母憂居喪一依古禮釋服起補安慶知府時親藩景王之國道經皖城當道議折民廬舍爲行宮民心皇皇檀曰行宮一時事毀數百年民居吾不忍也遂移於城東無人處王至預設供饌百

務咸整反嘉悅焉尋陞山東鹽運使逾年疾作卒於官巡撫張公鑑厚遺扶櫬回家檀資稟厚而信道篤所學淵源於陳獻章上溯龜山所著有心源問辨錄及漳平縣志學者稱爲廓齋先生祀鄉賢

廖溶字漪園龍巖人少侍其父星崑肆力古學博覽羣書繼乃究心二程及朱子遺書沉潛反覆講明其義鄭虛舟嘗稱之曰閩洛之學不講已久今得先生爲倡學者始知有所宗康熙辛卯舉於鄉壬辰會試中式以覆試卷被墨汙報罷不少芥蒂退主新羅講席立論學七則至今學者奉爲圭臬書院講堂顏曰敬業溶係以句云敬以攝心莫把賢傳聖經竟從

口頭念過業在復性須將天德王道實向身上做來晚就長樂教諭訓諸生總不出此旨生平事親從兄取友毫無間言所著四書粹言陰陽象數圖說朱子陰符經本義四書制藝行於世續

### 儒林列傳

劉棠字君美龍巖和睦里人今分漳平縣元祐庚午魁開封府解居

官有善政綱舉而網疎嘗賦舜不窮其民論勸農孔孟二策皆爲場屋楷式次年登第歷諸王宮教授樞密院編脩官編成哲宗御書出催遣江北輦運尋爲利州路提舉學事又爲兩浙路常平提舉歷官至朝請郎乞致仕得旨許省親附表

### 龍巖州志

#### 卷十二

人物志上

四

謝中有云繡服聽其過里之榮版輿假以奉親之便銜恩若此圖報謂何遂力丐宮祠尋致仕朱子嘗稱曰劉棠舜不窮其民論好歐陽公亦喜之見一統志祀鄉賢

蔣輔字廷佐龍巖人宣德舉人授廣安州學正歷金谿訓導藁城吉水教諭寧國府教授隨在脩學宮育人才以文學爲會試同考官者一鄉試者二秩滿乞歸事繼母倪氏尤謹居家不輕至公門嘗遜羨地以裨射圃與鄉人講行藍田鄉約爲學以存心爲主學者宗之年八十三卒著有泉巖文集祀鄉

### 賢

黃芹字伯馨龍巖人嘗從學蔡虛齋沈潛精義言動不苟漳守

陳洪謨徵脩郡志正統元年歲貢授海陽訓導身教端謹學者宗之嗣以親老乞歸所著有易圖識漏易經口訣史圖纂要家禮易行等書

柯鑾字範吾龍巖人萬曆十年歲貢授惠州訓導凡講論皆以誠意正心爲主粵士多就正焉轉建陽教諭闡發伊川安定之訓及歸築庵自娛不履城市祀鄉賢及建陽名宦

陳九敘字爾纘漳平縣人受學於曾廓齋以簡易中正爲宗登萬曆甲戌進士授刑部主事用法平恕歷員外郎中出守處州事簡政清時進書生論學士被容接如坐光霽中左遷鹺司尋讀禮歸起補桂林府同知實心惠民水操愈勵尋致仕

結廬社中接引後學半刺不干有司時有議割和睦一里屬大田縣者民心皇皇乃徐以一言聞於當事議隨寢邑人德焉自居官以及致仕未嘗問家人產嘗言學必成其大不在一節取名高學必成其是不在與人競門戶沈古林王東里耿楚侗諸先輩咸印可其學以爲正脈卒於家有心源錄及詩文數卷行世祀鄉賢祠

葉時新字蒼竹漳平縣人年四十力學有得盡焚其少年雜著與陳文溪蔣蘭居講明窮理致知之學乃隱居教授里中士多出其門稱爲秦窩先生

陳龍翔字于墀漳平縣人以恩貢授泉庠司訓嘗條上教規學

使者嘉納行轉江西德化教諭署德安縣篆一期與民休息以失太守歡去復就淮藩教授踰年告歸龍翔早失怙事叔如父迨叔父子繼歿撫其孤子女無遺力生平不道人惡不訐人私見人一好事則喜嘗與楊復所孟我疆及同鄉陳文溪講學相善歿後以子六韜貴贈中翰祀鄉賢及泉名宦章士穎字君實龍巖人順治丁酉舉人居家孝友究心墳典素負才望與脩邑乘初授龍安司李未幾缺裁改陝西禮縣尹請免民糧千餘金衛米二千五百餘石軍民勒碑誌之閱秦州志載一中分造化圖乃取周易圖參攷同異融會貫徹著易說窮源能闡前人所未發刊行於世雍正九年舉祀鄉賢

龍巖州志

卷十二

人物志上

六

蔣翎字鳳舉號丹峯龍巖人少穎異經術淹通爲文不拘一格乾隆丙午領鄉薦乙卯捷南宮甫揭榜遽聞母訃匍匐回里嘉慶元年  
詔舉孝廉方正汪撫軍以翎薦服闋

殿試授刑部主事竭力奉公不辭勞勩秩滿擢本部員外郎總辦秋審執法不阿曹議有未協者必反覆辨正間有齟齬不顧也尋以京察

記名御史因年力漸衰引疾歸行李蕭然舊書數篋而已里居授徒家無儲石足跡不及公庭惟日與門人講學爲事所著儀禮輯要敘雪堂綴聞

所載皆刑曹事實及戒訓

近取錄等書

所載皆古待粹言

梓未第時著有經義質疑已□□去續

郭斌字絢章號木軒龍巖人博通經籍兼工制舉乾隆戊申舉於鄉屢薦春官未第晚年授徒於西山之麓所詣益深門徒益進斌於諸子百家詩古文詞靡不研究而宋儒語錄漢唐註疏功力尤爲深邃每析一解剖一義本本源務明其端委而後已爲人沉靜寡欲不苟言笑門人魏茂林官內閣時寄以對云道心靜似山藏玉書味深於水養魚時稱爲知言所著讀四書偶筆六卷讀經偶筆十二卷春秋條貫二卷雜著偶存八卷詩稿及制藝若干卷待梓續

名臣列傳

龍巖州志

卷十二

人物志上

七

王源字啟澤龍巖人永樂進士入庶常出知深澤縣民愛戴如父母累上疏言事有旨召用至京陳時政謂毋苛刻以害政體母黷武以妨農工好異端則正道隨泯聽邪說則忠讜無聞時有西僧見幸故源及之上怒下獄會赦復原官陞春坊司直郎侍諸王讀方講說間王他顧源正色曰臣所講皆治平要道不足聽耶王爲改容後改衛府紀善遷松江同知奏罷逋租數十萬石置豪民號五虎者以法時刁民褚路等誣奏左道二百餘家逮繫甚衆源悉平反之以母老乞終養母卒居喪盡禮服闋以兵部尙書王驥薦爲職方郎中出知潮州府賜宴給驛以往下車舉廉龍黜貪墨脩郡縣學宮立社

學以教育後進造廣濟橋除虎患築長堤六百餘萬文以防  
水勢潮人因其姓爲名堤報政晉階從二品俸尋致仕潮人祠  
祀之年八十卒源天資英敏凡書一二讀終身不忘下筆數  
千百言立就所著有葦菴集書傳補遺家禮易覽及異端辨  
等書陳白沙謂吏於潮者多矣其有功而民思之唐莫若韓  
愈明莫若王源云祀鄉賢祠

石應岳字鍾賢龍巖人先世以武功襲龍巖所百戶至應岳登  
隆慶進士入中祕補禮科給事中擢掌戶科以外艱歸嗣起  
爲禮科都給事疏請祀布衣陳眞晟於鄉凡所條奏皆井井  
秩滿擢太僕少卿晉應天府尹時與御史大夫海忠介瑞相

矜契都人有總憲清如水京兆白如霜之稱嗣奉勅提督操  
江協理院事擢少司馬恩威並用東南倚焉復召入爲少司  
徒疏乞終養上許之居鄉甚溫且約謝絕塵繁鍵戶著書有  
文集若干卷卒男貢生惟馨請卹典贈戶部尙書恩賜祭葬  
蔭孫蘊璞入太學黃石齋先生爲立傳補載藝文

蔡夢說字君弼號梅巖龍巖人早慧弱冠領鄉薦登萬厯進士  
繇中書晉御史初按吳劾西陵侯籍田千餘畝築銅陵堤以  
廣水利人稱蔡公堤再按粵敷法振紀戢撫瓊饌諸寇封疆  
靖晏造湖城石梁禦水患民賴之皆建祠崇祀公按粵時見張居正子嗣

修流離戍所上疏乞宥海內名請歸家居侍親外悠然煙霞  
公咸服其膽識疏現補載藝文

間旋以夙望起海南道兼督學政轉南韶道參政會交夷襲  
欽州制府意向首功說嚴止妾殺稍有異同上疏乞歸結廬  
郊外謝絕城市素爲李見羅王文肅所重生平操脩清介舉  
止端方爲鄉閭士夫矜式著有日省錄自筮仕至大耋每事  
必書以自攷自題曰愧全子大司寇許宏綱志祠鄉賢黃石齋先  
生有蔡梅巖  
碣補載藝文

王命璿字君衡龍巖人登萬厯進士知新會縣以清介擢陝西  
道御史時內宦高竄肆害於閩璿抗疏劾之得旨撤回巡按  
廣東以澄清吏治培植士風爲汲汲驄馬所至咸立祠祀以  
志思焉天啟間轉大理寺太卿持法平允釋積獄四十餘官

龍巖州志

卷十二

人物志上

九

嗣以內宦魏忠賢專橫交章劾幾不免適以母憂歸崇禎初  
起刑部侍郎署部事忤權璫意閒住甲申之變抗節入山賚  
志以歿我

朝詔脩明史禮部檄閩訪璿遺書曾孫教諭秀芳出所著奏疏  
文集二十卷以獻祀祠黃石齋先生有王廷尉碑記補載藝文

宦績列傳

周純字潛文龍巖人年十八試心靜天地之鑑賦補國子監魁  
登治平進士任建安令時建寇廖恩剽掠南劍純募敢死士  
得千人蹤跡賊所日夜薄戰屬朝廷招安後廖爲延郡部曲  
純以事至延廖曰是窘我者也我三日不食詔書稍緩死是

人手矣更任普寧項城二縣元祐初蘇轍舉純善治財賦自御史臺簿提舉江西常平適歲荒畱上供米十三王三志作萬斛以繼費全活甚衆歷京西運判淮南提刑入爲戶部員外郎出知應天府上章告老以朝散大夫直祕閣致仕居家不問有無於近郊東湖構湖止堂以居僅庇風雨工書法凡郡邑有勝處多留墨蹟云弟綽登熙寧進士官戶部員外郎時有大小戶部稱焉綽爲元祐黨人孫邠登乾道進士授南安大庾縣主簿祀鄉賢

龔原字安道其先邵武人宋太宗時御史穎之後也徙居龍巖登熙寧三年進士歷任國子司業朝奉郎知連州累贈通議

龍巖州志

卷十二

人物志上

十

大夫元豐間朝廷方以財用爲急所在皆務峻刻以希上意原獨寬平不迫民德之子時可紹興特科知寧德安溪二縣克登宣和進士任潮州推官時升入國學孫嶒登乾道進士授新州教官曾孫惟敘嘉泰特科任貴州推官五世孫頥登淳祐進士任莆田尉見一統志祀鄉賢

黃琮龍巖久重和元年與弟靖同榜進士知封州州當廢併之後倡建學宮出官羨營署置學田百廢俱興士民賴之採閩書補

林瑜字子潤龍巖人洪武中以太學生授五軍右斷事讞獄多平陞江西僉事轉副使聲望彌著時湖廣長沙寇亂瑜兩奉詔往撫之咸推誠得副所詔歷三考陞浙江左參政踰年卒

於官民思慕之瑜居官二十餘年自奉無異韋布每誦汪信民咬菜根之言自勵性和厚樂易用法平恕所至以禮賢雪獄安民爲先見一統志及金幼孜墓表楊士奇誌銘祀鄉賢

子京別有傳

張觀龍巖人永樂乙酉舉人任監察御史執法不阿巡按湖廣

貪墨聞風解印時號張虎終廣東僉事採閩書補

陳瓛龍巖人永樂丁酉舉人閩書作監生誤任昌化縣奏革撫黎土官

積患遂免縣多浮沙薄土田易旱教民築堤蓄水民甚德焉

採閩書補

鄧誠字伯睿號實軒龍巖人永樂丁酉舉人初授浙江台州通

龍巖州志

卷十二

人物志上

十一

判旋丁母憂服闋授江西臨江府通判嗣署府事脩陂塘以灌民田完堤岸以捍民居嚴課桑棗歲久成林民賴其利尋引年致仕卒於家臨民於堤邊建祠以祀名其堤曰鄧公堤

採家譜補

林元龍巖人宣德間以歲貢閩書作進士授潮州府推官讞獄明允

嘗釋無辜百餘人稱曰于公復生以憂去起服改贛州府釋

龍南良民爲賊誣坐者十餘家卒於官民思之祀鄉賢

邱昂字致謙龍巖人由太學生授岳州通判賑飢活民奏免歷

年逋稅在任七年清譽顯著以外艱歸岳人立去思碑起復

補揚州時巖經沙寇亂後昂奏請築城調官軍守禦并議設

汀漳兵巡道疏擢順天府治中致仕母章氏年九十雙瞽扶  
持不離膝下傾俸餘脩先塋立祭田第宅與兄弟子姪同居  
人稱有趙氏風祀鄉賢

張冲字宏謙龍巖人

宣德間貢

任進賢縣廉明強幹勗學宮築城垣

增圖籍置義倉撫民如子時致野蠶成繭瑞蓮靈芝之異秩

滿奏留卒於官百姓巷哭祠祀之

兼採閩書補

蘇鏞字仲戡龍巖人登成化進士授河南崇府右長史本司有  
羨餘沿取爲例鏞盡革之汝寧荒啟王減田祿之入以賑民  
盡心輔導王重之奏加中順大夫以憂歸服闋復任晚節益  
堅尋乞致仕正德間晉階亞中大夫鏞爲人和而不流孝友

龍巖州志

卷十二

人物志上

十二

篤至所著有浴心遺稿祀鄉賢

杜陽龍巖人成化辛卯舉人爲廣東布政司經歷清脩苦節士

論重之

採閩書補

陳冕字尙周號緘齋漳平人成化丙午舉人任湖廣江夏縣教  
諭手勒忠孝二大字於明倫堂振鐸有聲擢南畿盧州通判  
公平忠恕巡按御史疏冕行與心符政從理出陞武岡知州  
未抵任丁祖母憂服除補山東濮州首興庠序脩學宮朔望  
集諸生講堂解釋經義史傳凡文章節義之士尤樂崇獎激  
厲濮俗一變又於州北築觀德堂教民習武爲一方保障已  
而海寇肆掠果不敢犯濮境大憲交章以兵備薦命未下卒

濮人哭之如喪所親補

陳和字廷雍龍巖人宏治進士知桐廬縣報最擢南京監察御史按治有聲遷河南僉事以撫民平寇功受欽賞陞山東副使徐揚等處兵備所至問民疾苦折獄慎刑未幾以疾乞歸嘉靖間起補湖廣副使未行卒和志趣高潔清儉恭謹自題有兩字平安天地祐一生清白鬼神知之句士大夫咸稱爲眞清白吏云其功德具見桐廬去思碑及封邱生祠碑記祀

鄉賢照王  
志補

陳表字文獻號東谷龍巖人性英敏軒豁邃於易學明正德間以歲貢任四川重慶府訓導都御史見素林公巡蜀器其才

龍巖州志

卷十二

人物志上

十三

嗣以東西川寇亂卽委署南川設險督戰先後擒劇賊一百二十三人縣故無城郭爲設馬瑙關已而賊逼郡城守臣授兵六千使備江北迺激以恩信人期死戰賊聞避去總制幸菴鼓公勞上其功旋署巴縣永川綦江墊江江津所至有聲上官薦授劇任格於銓司之議迺擢浙江金華府湯溪學教諭未行卽以禦寇功加二級致仕歸葛巾野服以文藝自娛子翰誥能世其學重夔崇祀名宦見總  
誌補

鄭偉漳平居仁里人正德間由貢生任湖南攸縣知縣調漢陽

知縣年五十餘解組歸官歷二任囊無百金以清介見重補

邱鏞字廷任龍巖人嘉靖己酉鄉薦授廣西遷江知縣綏善翦

惡洞察民隱陞橫州知州遷瑞州同知時巡按某有訪犯屬  
鏹勘訊廉其寃輒爲末減三駁不可奪終格於巡按之議遂  
解組歸鏹有媿少而寡誓守志特築一樓以居事之甚謹鄉  
人稱之舊列義汗

王以通字太拙龍巖人萬厯進士授南城知縣以善政擢南御  
史轉瑞州知府疏請減高安浮糧五萬餘石不報改韶州知  
府陞楚臬前後執法不阿人皆憚其風軌無敢干犯者居鄉  
溫厚治家不侈年八十三而卒祀鄉賢

蔣時馨字德夫漳平縣人萬厯丁丑進士授新喻令潔己愛民  
值江陵行文量法當道以報竣後期交章劾之調嘉魚民遮

龍巖州志

卷十二

人物志上

十四

道泣留按新喻名宦志載公以丈糧受誣民作歌謠納之竹筒中浮於江面直達會城乃白糧改任湘潭喻人思之不  
置爲立生祠並建去思亭於東門外豎碑焉文衡於道光癸  
未署縣事見其碑記中云壬午之冬改任湘潭繼丁外艱道  
及經一見川百姓扶老攜幼沿江而迎公聞易小艇潛去民以不  
俱劾調嘉魚與新喻名宦傳及碑記至嘉魚愛民如新喻稍遷

南廷評調南銓部丞再調考功郎門絕私謁時孫公丕揚爲  
政值計察委心時馨所察多海內有力者一時羣起交攻乃  
謝病行豫章李材寓漳倡道海濱時馨師事講脩身爲本終  
日不倦後推起奉常而時馨卒矣所著有體仁編傳於同志

祀鄉賢新喻嘉魚俱祀名宦舊列儒林

魏鳴朝字端前志所龍巖人萬厯戊子舉人授泰寧教諭倡設

學規悉本蘇湖行之三年士風丕變巡撫金學會巡按劉應龍咸獎許焉擢安仁令遇歲荒採糴以濟民食弭盜賊平水患革陋規民德之尋遷趙府審理有去思碑續舉祀鄉賢王尙賢字士纘龍巖人萬厯舉人積德好義民有鬻女者罄囊贖還之仕新寧知縣多惠政適順德缺令檄賢攝兩邑民相爭致尋卒於官囊如洗俱建祠祀以子命璿貴贈刑部右侍

郎祀鄉賢

舊列義行

章元璞原名焜字爾樸龍巖人萬厯舉人授繁昌教諭督學賈繼春檄閱卷所拔皆知名士鼎甲劉若宰其首也陞雲和令撫字有方士民尸祝之轉昇東提舉轉武緣知縣致仕優游

龍巖州志

卷十二

人物志上

十五

田野年八十二卒

舊列文苑

廖天瑞字季符寧洋縣人萬厯丁酉舉人除江西新昌知縣有善政能得士如吳甘來漆園熊士達吳泰來諸名輩皆出其門致仕歸囊篋蕭然突黔頻報又能捐所居以建宗祠族人義之卒年七十四

舊列文苑

張盛文字惟實寧洋縣人萬厯庚寅歲貢授江西臨江通判以廉能攝新喻峽江篆俱有聲擢崇府長史以讀禮歸杜門不出邑有民瘼時留心焉如調停永寧鹽政可攷凡居處有古

風屢膺賓薦

舊列鄉賓

張存儉字心廉寧洋縣人萬厯二十年歲貢授沂州判官有政

聲旋致仕邑令跡其生平事實詳舉賓筵舊列鄉賓

連瓚字鳳雲龍巖人萬厯恩貢授廣東興寧訓導嘗署興寧邑

篆平寇築堤民利賴之工古文辭脩龍巖志議立宋文丞相

祠有記充店租陸間為學中公用雍正三年詳請入祠舊列文苑

鄭如蕙號茂谷龍巖人十歲能文長益力學與兄如蘭弟如萼

切磋若友生以明經授粵新會丞勤敏有為清操自勵御史

田公王公交薦拔署河源源民多輕生蕙至力革其俗聞某商為

寇掠急往捕獲金八百餘貯還商華地僻俗陋且近獠數為商請留二百嚴拒之擢楚江華令

患迺躬詣獠所集酋長論以恩威自是獠不敢犯而民風亦

丕變尋致仕歸舟次衡陽阻寇後聞公名乃詫曰廉吏也各

龍巖州志

卷十二

人物志上

謝去御史何公熊祥作新會去思碑補

林松聲龍巖人萬厯中光澤教諭資身簡約不較贄饋貧生稱

貸常不責償採閩書補

賴有中字衷禮寧洋縣人萬厯己未歲貢授河南信陽州判巡

按邱兆麟以良賢薦陞廣西荔浦知縣浦俗樸陋教以禮讓

民化之罷職歸鄉里重其望兩薦賓筵卒吳唯齋撰墓誌舊列

鄉賓

鄧林字喬柱寧洋縣人泰昌恩貢授雲南楚雄府推官居滇八

載慎獄詳刑歷膺上薦署楚雄姚安大理永昌四府篆及騰

越州琅井諸務所在著令名宦橐如洗陞陝西西寧知州蒞

任甫七月流寇猖獗指畫守禦焦勞成疾卒於官士民哀之  
柯元伯字康侯龍巖人崇禎進士知東陽縣有善政邑人稱曰  
一心如水百度改觀建祠尸祝焉考最陞戶部主事署雲南  
司度支有條召對稱旨擢河南道御史巡按陝西茶馬時秦  
中流寇蹂躪商人失資引元伯病之設法疏通使三省軍民  
數十年積窳馬政茶法一一剔清轉汝輝道兵備副使卒於  
官祀鄉賢祠

李佺字淡方號伯韓漳平縣人崇禎間聯捷兩闈初授廣東新  
安令尋調海豐豐多善政民爲立祠歷兵曹轉粵海巡憲掛  
冠歸丙戌

大師南下以佺在粵得民特授嶺東副使尋致仕

縣志補

吳之奇字元夫龍巖人崇禎丁丑進士性落落寡合爲江都令  
清操自勵以不能逢迎被劾歸里家居取與不苟其持守爲  
不可及云

補

陳王綸字東石龍巖人崇禎丁丑歲貢授雩都教諭勤課士署  
本縣篆廉潔正直有濟變才時強寇謝志良等肆掠率精銳  
平之及張獻忠寇城百姓請暫歸順免難王綸厲色叱止率  
衆櫻城死守卒無恙以全城功晉階儒林郎六品秩致仕歸  
鄭憐字丹嶽龍巖人順治庚子舉人辛丑進士知奉化縣多惠  
政善造士士民戴之未幾以齟政罷歸杜門著述不事干謁

唯造廬請業者諄誨不倦

魏士袞字公錫龍巖人順治甲午恩貢甲寅耿逆變強僞職挈家匿山中迨

王師入閩啟迎焉巡撫吳委署汀州教授督課有聲其居鄉簡重亦有古風

吳材字豫木寧洋縣人汝宗之子少卽自拔於俗登順治辛丑進士授大城令會水災力懇 題請蠲賑民德之大司空劉公愚爲碑記致政歸構別墅課子弟不事干謁至邑有利弊力陳當道而未嘗汲汲自明年七十而卒

吳梓勤字而行寧洋縣人順治乙未歲貢授尤溪訓導課督有

龍巖州志

卷十二

人物志上

十八

聲士風丕振致仕歸鄉里以齒德推重兩薦賓筵卒年八十有四舊列鄉賓

廖慶辰字星巖龍巖人康熙丙午舉人授江南婁縣知縣廉靜愛民尤勤課士報政卽辭榮解組士民遮道留見攀轅留香等集

鄭玟字伯潤龍巖人康熙庚午舉人除三水令有循聲築堤岸以興水利建書院以振士風請蠲免錢糧以恤災黎其著者也在任十二年以母老乞歸生平崇尚正學兼工詩古文詞嘗編輯程氏日程呂氏鄉約等書以教後進所著有文鈔詩鈔刊行

李其昌字開姚號念常龍巖人康熙庚戌進士初署淳安以振興文教爲己任每逢朔望講學於學海堂拔其尤者優獎之貧乏者捐俸飲其膏火壬子分校所得皆知名士閣學錢公諱載其尤著者尋補桐廬爲民懇免糧米六百石百姓勒碑誌德丁內艱闋服銓四川梁山時嚙嚙不靖民情洵洵甫下車團練鄉勇擒賊首十餘人民始安堵又多設義學爲一邑文教倡在任年餘以疾終官舍囊無餘貲百姓爭助斧資始得扶櫬回里生平一介不苟嘗謂學者曰義利關頭不破不足以言學所著有尙書註解四卷自訂稿四本念常外集若干卷歿後因郵寄閣學錢公校定遺佚今念常稿現行於世

龍巖州志

卷十二

人物志上

十九

參巖州府名宦志續

朱廷鴻字大羽漳平人家貧力學折衷經史疑義具有本原嘗從蔡文勤公講考亭之學其教人務以身體雍正元年領鄉薦時年五十矣再上春官未第恭逢

上諭九卿保舉倉場監督文勤以廷鴻薦遂就職事雖小必親革去倉厰陋規出納之留難胥吏之中飽一時弊絕三年差滿未及陞敘而卒

縣志續

朱陽字桐野號菁溪漳平人乾隆壬申進士選庶常假歸丁母憂服闋散館改授雲南通海令縣故疲弊又值新羅地震大災下車問民疾苦境內恬然調寶寧緬匪不靖

王師西征檄調役夫輦運軍裝捐俸赴驛所僱募竣事晏如民不知也積勞成疾卒子泗字道原號松臯乾隆庚子舉人選仙遊訓導先是隨任寶寧時軍興旁午代父任其役出入戎馬間衆皆服其幹畧及任仙遊臺匪滋事大憲廉其才檄往楓亭協辦驛站又委運兵米渡澎湖甫出外洋颶風大作舉船震恐泗獨神色自若竟致米三千石既回任事關學校加意整頓 文昌誕辰泗捐俸契典鋪九間交諸生歲收稅錢充費卒於官諸生於慶祝 文昌日並祀焉 續

吳濬字姚深號虞泉龍巖人年十八補博士弟子以棘闈屢躋遵江賑例授湖南道州知州州中民獯雜處獯俗嫁女聘貲

少歉有留至三十外不遣者下車日嚴行禁止俗爲之變丁內艱歸值乾隆壬申歲饑濬捐米數百石倡賑州人賴之服闋起補歸州子拱極丁酉拔貢 朝考一等充四庫館行走 歷政和同安臺灣寧化德化等縣教諭陞福州府教授言端行矩爲多士楷模孫輝嘉慶庚午舉人 續

陳新槐字桂材號敬齋漳卒人乾隆間以附貢應例選授四川筠連縣知縣甫二年丁憂闋服起補崇寧值金川之役辦理軍需備極勞瘁復以土城卑隘乃捐俸倡脩完固敘功陞廣東連平州知州潔己愛民脩理 文廟州人尸祝焉旋解餉入京太史蔡曾源爲宰崇寧時所得士呈以詩有云二十年

前知已感八千里外頌聲傳回任擢澳門同知逾年致仕歸  
蔡葛山相國贈言有保固善良剪除稂莠語年七十八卒於  
家續

饒用字起行號舫村龍巖人乾隆乙未進士初授淳安令邑中  
舊有清溪橋爲往來孔道圯於水民常病涉下車日亟令脩  
復僉曰青烏家言橋成多不利於官用毅然曰烏有是哉朝  
廷設官原以爲民民利乃官利也亟命脩之橋成適因遣犯  
逃脫去任民德之爲立主於水月菴以誌不忘繼官粵之思  
恩以地處僻隅文風未啓每月必進生童課以詩文引繩切  
墨俾其動合規矩而後已尋調上林亦猶治思恩分校粵闈

龍巖州志

卷十二

人物志上

二十一

所得皆知名士爲政尙寬簡不務赫赫名旣引年致仕歸主  
新羅講席十餘年著有計過軒詩文各集其舫村稿則王偉  
人相國嘗序以行世續

謝儀一字肅君號睂洲龍巖人乾隆丙午舉人博極羣書工書  
法及古詩文詞以大挑一等任河南靈寶知縣清操自勵不  
染一塵尋丁母憂去任改補仙遊縣教諭廉潔端方爲多士  
景仰卒於官囊橐蕭然積書數篋而已著有餐菊山房遺稿  
併試帖若干卷待梓續

謝天穆號綏堂龍巖人由貢生考職主簿遵南河捐輸例加捐  
授東城兵馬司正指揮嘉慶十八十九二年累獲逆匪林清

案內要犯多名二次奉

旨賞戴花翎加級陞用二十年選授安徽和州直隸州知州經都

察院 奏留奉

旨部選得欽之員定例不准奏留惟謝天穆屢次拿獲逆犯緝捕

認真此等具有天良之員不可多得着以直隸州知州頂戴仍

留東城指揮任一年飭令上緊緝捕欽此尋續獲要犯奉

旨加一級是年京察一等引

見奉

旨着以知府用欽此選授山東武定府知府到任後復先後拿獲

逆匪張七宋雨子王眞等奏奉

龍巖州志

卷十二

人物志上

二十二

諭旨褒獎二十三年本省臬司溫承惠因案詳參奉

旨革職留東緝捕尋得請歸卒於家

續

楊廷莢字獻階號瑞圃龍巖人嘉慶辛酉進士授山西虞鄉縣

知縣下車初廉知胥役私設地稅幾爲成例亟爲除去商民

如釋重負蒞任數月值地大震廬舍傾塌有壓斃者莢帶星

出入遍歷郊圻撫綏輯集民得安堵癸酉河南滑縣林清滋

事兵役過境經畫饋餉民不騷擾在任五年清操自勵以積

勞成疾卒於官囊空若洗百姓爭輸資斧眷屬始得扶襯南

旋諸門人復爲經紀葬務乃得安窆

續

李雲號炎軒漳平人嘉慶戊午舉人任江西金谿縣知縣悃愾

無華愛民息訟創育嬰堂脩邑志自奉儉約居官不改儒素  
邑人頌之有最難爲者民之母不愛錢焉吏亦仙之句尋引  
疾歸家居四載卒續

謝大錫字質疑號蔗田龍巖人嘉慶庚申舉人性聰穎於書無  
所不覽古文駢體文皆有師法獎惜後進以大挑二等補長  
樂訓導與諸生談藝無虛日四方來學日衆操守甚嚴有因  
事饋金者概辭不受尋卒於官士民均感其德歛金俾其子  
扶櫬歸里又爲設木主建祠於明倫堂之偏歲時報享焉續

王之楫字濟川號木齋漳平人嘉慶庚申舉人歷閩縣鳳山訓  
導俸滿咨補尤溪教諭勤於訓迪所至以振興名教爲務尤

龍巖州志

卷十二

人物志上

二十三

邑學宮前火災捐俸倡脩生平樂與人善咸得士心卒於官

宦橐蕭然續

忠節列傳

郭鉉龍巖銅砵鄉人弟鍊俱驍勇善戰兼通韜畧時元將革命  
羣盜四起乃在本鄉築土爲城盜不敢犯景炎二年正月文  
丞相文山移屯漳州辟侯兄弟爲左右前鋒三月復梅州四  
月復會昌六月又敗元軍於雩都兄弟身中十餘矢血流滿  
甲猶竭力衝突文山上其功得侯爵八月文山以侯創甚遣  
屯梅州後文山兵潰侯潛師迎文山入巡梅欲拒險以守文  
山不可迺屯兵潮陽至五坡嶺遂與文山被執張宏範愛其

勇勸之降侯曰吾豈降將軍哉拔劍欲自刎宏範義而釋之  
侯不忍去文山揮之曰殺身無益幼主尚在厓山若天未絕  
宋求真人於白水天下事尙可爲也侯泣而行至厓山值陸  
秀夫負帝赴海死張世傑亦舟覆而亡仰天嘆曰宋不可爲  
矣時宏範已送文山入燕侯無所歸乃回巖至元十九年文  
山柴市訃至侯兄弟西向拜哭淚盡繼以血而死是日天晝  
晦里人爲立廟迄今奉祀勿替

劉銳字伯剛龍巖人登永樂十九年進士授行人陞戶部員外  
郎居官清白乞恩歸省適沙賊鄧茂七作亂其黨侵逼龍巖  
衆欲逃去銳諭以討賊激以忠義相從者數百人時郡師適

至進與賊遇不利退守郡城銳獨率衆力戰被執罵賊不屈  
死祀鄉賢祠

林京字洪中龍巖人參政瑜之子有摯性澹榮利博學工詩文  
以浙參議戴同吉薦強起之偕計天官辭以母老不受職歸  
隱沙寇之亂與同邑王元弼謀請師要其去路至龍門上坪  
京遇賊被執脅使下拜乃瞋目罵曰恨不磔汝萬段肯屈足  
耶其子綬跪請曰父老且病足吾當百拜以代父京叱曰人  
生當知順逆汝欲爲苟免乎賊怒父子俱被殺京祀鄉賢祠  
翁智龍巖人少工舉業爲名諸生明正統間貢太學沙寇之亂  
智以官軍旣敗召鄉勇及弟子等背城一戰與質菴全日而

死補

翁長生號質菴龍巖人正統十四年沙寇入巖官軍敗於鉄石洋長生率子弟及鄉勇等與賊戰於城下陣亡王太史韋菴爲作墓誌銘云忠烈有聲志莫成全城義重一身輕魂歸幽室貞心在風木滿山助咽鳴補

石源字毅齋自來安徙居龍巖少精武藝通孫吳陣法初試錦衣屬緹騎帥失職遂調閩鎮海衛時倭寇甚急源上禦倭策倭聞源名遂遁去會交南事起統軍千餘大戰寧橋幕下士俘獲最多入保昌江賊從外起土山以飛鎗射入城中源提敢死士夜開門殺賊賊遽遁復爲地道以入源從溝中迎擊

龍巖州志

卷十二

人物志上

二十五

相持九閱月以援兵不至城遂陷賊入猶拋巨石傷數人乃遇害事聞時方議棄交南僅加一級以百戶襲補

張自淳龍巖人爲贛州守備嘉靖二十六年倭寇犯贛自淳奉巡撫龔檄總兵會勦晝夜鏖戰殺賊甚多未幾寇勢猖獗而援兵不至爲賊所執倭愛其勇手摩淳肩勸之降淳瞋目大罵踢傷其左腿倭怒分裂之投其尸於河二子成遵成道亦相隨投河而死指揮馮英輓以聯云罵賊踢倭不負乾坤正氣分尸投水適成今古完人補

楊繼卿字仲欽龍巖人明崇禎五年授北直臨城縣典史時流寇鄔顯吾犯臨城繼卿出禦敵身冒矢石斬賊數百寇遂遁

旋奉道轅委檄往檀裕等處安民寇復集一時無備遂爲所  
執拘囚五日不屈而死軍門奏予諡賜葬祀臨城名宦補

吳汝宗字得之寧洋人少聰敏七歲能屬文試輒冠軍崇禎八  
年以貢授東阿縣令歲饑極力蠲賑有治聲十七年

大師下東阿汝宗捐軀以殉阿士民哀之立祠祀焉乾隆四十一  
年錄故明死事之臣

勅祀忠義祠

賜諡節愍

詔書具載譜乘而寧祀鄉賢自汝宗始

陳六韜字子儀漳平人登崇禎戊辰進士授中書歷禮曹備兵

龍巖州志

卷十二

人物志上

二十六

於天津津鄰強敵征供無藝民少固志韜至撫其民大閱水  
師扼險隘築興濟城增肅寧之堞浚交河之川爲守禦具是  
時防衛單弱韜檄各縣倣周官田賦之法令十甲出戍卒一  
人月歛錢五文五日一操一月之間人戍六日一歲家出錢  
六十文而守戍已具於是河間景州任邱靜海諸郡縣臂指  
相連屹然爲畿南保障旣而內官盧某者出監軍凌爍縉紳  
韜與抗禮不假借盧啣之豕宰謝陞恐其構禍也乃疏改韜  
武德時良鄉雄縣已破巡撫方在德錯愕不知所爲聞韜至  
延問計韜笑曰德州阻險之地詎不可守耶當爲都閩捍之  
辭而出見執兵者絡繹詢曰我城外居民也使我守城韜曰

第歸家爲巡撫白之乃入見曰寇未至而煩民是自困也以城外之民守城內彼心懸城外寇遠猶可約束寇近散矣我誰守者巡撫悟乃諭去幹遂爲經畫守禦召城中紳士共守之而自辭往武定三日撫臣復催促歸德旣而京師告嚴幹遣衆三千人自齎行糧以入衛撫臣襲爲功敘績不及幹幹亦不自言而盧闔終恨幹隨借事中之解官歸幹性好佳山水家於永安之桃源甲申信至撫膺痛哭曰幹何以處此數日鬚髮盡白丁亥春舊弁陳國祚寇平邑有誣幹以勾引者幹歎曰我甲申來久分一死今死後已給長子金書出遂鍵堡舉火自焚從死者次子金境及妾朱氏王氏傅氏冰姬四

人幹爲人微至而慈惠九歲能爲詩文博洽羣書尤喜讀孟子終身以爲指歸所著有二漳文集詩集數十卷行於世

李鎮國漳平人由邑庠生入北雍順治四年

大師南下撫軍佟督師李咸知其才令從征廣東以功授雷州司李尋守郡爲寇逼城陷不屈死

林佺字握佺龍巖人少通韜畧由漳營行伍歷官福州城守營守備順治十六年署兵備道都司兼遊擊事十七年剿海寇陣亡晉

贈武翼大夫

勅祀忠義世襲恩騎尉乾隆二十九年功臣館奏補祀京都昭忠

祠三十年祀本州忠義祠陣亡日以子幼弟瓊山承襲

補

陳麟字靈昭一字石蒼龍巖人乾隆庚辰舉人壬辰應挑以知縣試用江蘇歷署沐陽阜寧俱有政績嗣補徐州府沛縣甫涖任見宿案塵封力爲清理民德之辛丑黃河水漲沛尤甚麟築堵捍禦十日夜不休未幾堤決洶湧入城麟以倉庫冊籍關係國計民瘼挺身奔護遽致淹汲制府勘實題奏以陣亡例追

贈道銜

賜歸葬給葬費銀百兩祭品銀六兩

勅入忠義祠蔭一子慶嵩以知縣試用授四川龍安府江油縣歷

龍巖州志

卷十二

人物志上

二十八

署南充劍州勤於撫恤所在俱有政聲嘉慶五年協辦白蓮教匪軍需以軍功加級隨捐陞直隸州知州西藏管理巴塘軍糧府尋以原品致仕

續

尹貴龍巖人臺灣北路右營把總驍勇善戰乾隆五十二年十月初六以臺匪林爽文滋事奉派勦捕在蓬山汛打杖陣亡經大學士福彙奏奉

旨勅祀京都昭忠祠准給雲騎尉世職襲次完後特給與恩騎尉

世職罔替

續

鄧仕安字北山漳平永福人洪武間應募以功授泉州武鎮千戶勤勞王事卒於官贈武毅將軍因葬在崇武大石頭至今

泉人號爲將軍墓 補

陳天達字可行漳浦縣人漳平縣學生少孤寡甚授徒自給爲弟妹婚嫁康熙庚戌成進士時年五十九矣甲寅耿變攜家入山與其子講明經義耿脅之仕不應幾得禍丁巳恢復總督姚公啟聖爲天達同年友將特疏薦之天達以老病固辭日與親友子弟講學課文年九十猶手不釋卷與人推誠相與一無所飾但非禮不可犯親知顯貴不輕問遺非公事未嘗一至郡縣卒年九十有二 舊列介節

陳汝翼字捷高漳平人乾隆乙丑武進士由花翎侍衛授甘肅

黑城營遊擊調署哈密又調雲南大理府遊擊署參將攻孟

龍巖州志

卷十二

人物志上

二十九

艮城城周三十餘里將破時值大兩防其突圍而出晝夜泥濘中爲毒水所浸病浮腫卒於軍年四十有五軍士惜之 續

右忠節前志僅傳劉銳陳六翰吳汝宗三人而林京另標

義烈李鎮國另標忠烈共得五人夫以死勤事之謂忠矢

志不渝之謂節忠節立而爲義爲烈可以類從矣若乃郭

侯兄弟則列在仙釋載其少遊九侯山遇異人授以遁形

變幻之術禦寇輒立奇功沒且靈異鄉人祀之宋未封侯

若不知侯係宋何年世人者至隸文山麾下從征得爵拒

敵始末俱不一及蓋當元代革命之後文獻無徵載筆者

或失於搜羅徒據村民無稽之談遂沒其忠節之實良可

慨矣茲採本廟碑文本州貢生郭聯峯撰云考文山所遺家書墓誌及稗野等書而彙輯之

按年代而首登之彼荒誕不經之說豈得以誣俟哉至翁

智翁長生石源張自淳楊繼卿等傳俱稽之家乘鑿鑿可

據林佺陳麟尹貴當奉

勅祠祀襲蔭例應補續他如鄧士安陳汝翼之死於營事不媿

爲忠陳天達之拒逆抗志能全其節故並附焉

### 孝友列傳

陳雍龍巖居仁里人後分屬漳平縣宣德初以歲貢入胄監除戶部陝

西司主事奉命山東催徵纖毫無染逋賦以完陞本部員外

郎卒於官雍天性孝友居母楊氏喪哀戚盡禮讓己田與其

兄子從弟貧不能婚捐貲助之邦人多其德讓

王元弼龍巖人沙寇亂與同邑林京謀要賊京被執死元弼度

不能支與兄用興匿山中賊恨其謀必菟殺之訣於兄曰今

吾兄弟勢不能俱全而父母又年老吾有子三長矣兄子尙

幼吾死之其兄不忍次日元弼私自出犯賊而死兄乃得免

鄉人重之祀孝義祠

連繼芳字以善龍巖人萬歷進士知德清縣水操愛民加意造

士遷別駕歷河間同知丁父艱復補常州同知歷戶部員外

郎轉安慶知府陞廣西按察副使疏請終養效斑斕娛親自

謂三公不易年至古稀而卒有文集行世子金思恩府同知

銑國學鏡舉人鉤遊擊鎔懷慶同知鑄京御經歷祀忠孝祠  
王以道龍巖人性孝友撫弟以通教育備至後成進士官至憲  
伯兄弟怡怡始終如一以孫命璿貴贈刑部右侍郎  
柯潤龍巖人事繼母以孝聞幼失恃遭亂忘母棺埋所朝夕哀  
號求之不得忽有異人指其處而獲焉人以爲孝感云以子  
元伯貴贈東陽知縣  
陳原吉漳平縣人性至孝親沒既葬結廬墓側悲號三年將歸  
有山人指其墓左曰此吉壤也及已沒遂葬焉其後裔果貴  
顯人稱爲孝感墓

陳思齊字效卿漳平縣人廩生事父母盡孝既歿哀毀喻禮鬚

龍巖州志

卷十二

人物志上

三十一

髮俱白及葬躬負土石以營之塚間常有甘露降靈芝生結  
廬墓側弗忍去遂家焉服闋應貢以祿養弗逮辭鄉人稱曰  
陳孝子學使者旌其閭蔣蘭居題其像曰巖巖樹範矯矯出  
塵辭榮趣寂好古力行叟其貌而孩其心八十居廬慕以終  
身斯之謂家庭之孝子亦允爲鄉國之全人  
楊琛字楚石龍巖人仕沅陵尉以平苗功晉辰州照磨署沅陵  
邑篆有治聲聞祖母病辭官歸侍湯藥不脫冠帶居喪哀戚  
盡禮遇歲荒捐租以濟貧乏鄉人德之舉入孝義祠  
鄧邦佐龍巖人素行淳樸會母病篤禱於神夜夢神告以割股  
肉燄之可愈遂割其股和湯以進母病果愈

張日華龍巖人父早喪家貧事母至孝及歿喪葬盡禮舉祀孝義祠

魏士謙龍巖人父隨祖任西寧衛經歷俱卒於官士謙往攜骸失所在徧尋咬指認之負以歸秦令黃居中贈以詩有穿石心堅通佛語呼天斷指認骸歸之句祀孝義祠

楊範字衍洛龍巖人弱冠首拔郡庠後隨父往漳應試遇山寇夜劫其父去範乃盡變產業借兵壯爲援親入賊營贖父歸逮耿逆叛後督師姚延入幕府參機密欲授以武職辭乃委任漳郡訓導教士有方所賞識者皆成大器道光十年祀孝義祠

龍巖州志

卷十二

人物志上

三十二

曹光伯寧洋縣人康熙甲寅寇入城居民驚走適其父有足疾不能避遣光伯自逃光伯守父不去遂被執寇詢而義之戒勿殺並得免時年甫十七後於父母生事死葬俱能承志盡禮撫兄弟子無異己子鄉里稱之子邑庠生黃榜乾隆二年詳請祀祠

吳卓字濬源龍巖州人寧洋縣學生弱冠失怙事祖母以孝聞仲弟珏早逝其婦張少寡守孤卓爲衣食訓誨得成立全節凡宗族姻婭有急無不周恤素善經營土木龍巖陞州後荆建院署文場脩學宮重建明倫堂築城堤諸大役卓皆力董之寒暑靡間越三載積勞成疾而卒續傳

翁道烈字巽白龍巖人庠生嘗營葬三世讓產伯兄撫弟遺孤  
知縣江藻廉其行舉賓筵舊列鄉賓

陳元英武庠生漳平人性至孝父眼疾瞽一目元英每日清晨  
以舌舐之百計求醫禱神積三年餘遂復明迨父歿居喪盡  
禮營墳距家七里廬墓側焚香進食如在日乾隆五十九年

旌續

饒文試字掄選龍巖人性淳厚而事親孝嘗割兩股以療親病  
鄉人亟稱之壯年服賈於外江湖皆推爲長者客瑞金時有  
窶人子鬻爲僧間其人僅一子也惻然曰若一子而又鬻之  
如後嗣何贖還之後其子用成進士爲上林令以覃恩贈

龍巖州志

卷十二

人物志上

三十三

文林郎續

徐彬字尹庄一字石亭乾隆己亥舉人嚴氣正性動合軌度父  
歿盡哀喪葬如禮其長兄繼父而亡只遺一子彬復以仲子  
嗣曰吾不忍嫂氏獨憐一子也季弟乃繼丹所出向往外經  
商彬因公車南旋挈歸爲謀嗣息族黨躓之四上春官不第  
家益落持守益堅至病篤時所得衣食必究所由來有不潔  
弗御也先是龍巖經學未興彬獨以博通倡之自後文風亦  
爲一變續

謝天挺字秀夫龍巖貢生篤於友誼昆仲六人俱年躋古稀相  
對怡怡白首無間人以爲有古人長枕大被遺風至一家二

百餘口綜理均平使長幼內外無不悉遵束約其家法尤不可及云續

林嵩謙龍巖人好讀書尤具至性家故貧承父有薄產以兄家計尤艱盡讓之舌耕糊口晚年境益困脯脩所入不足於供而兄弟怡怡食貧無悔生平好讀朱子小學內外篇其課徒亦諄諄以孝弟相勗續

謝德潤字廣泰龍巖人質樸無華有至性年二十六爲諸生時父服賈江西終客邸聞訃痛絕既走千里外扶父櫬歸葬畢廬墓一年母鄭氏年六旬餘病垂危顫天泣禱母壽登百齡居恆治家有法合家數十餘口調劑均平又博採先賢孝友

龍巖州志

卷十二

人物志上

三十四

格言登之屏障嘉慶戊辰科承恩登副車庚午恩榜賜宴鹿鳴一體會試以母老終養母卒喪葬如禮越數載繼卒時年八十有七生子五三天祿辛酉拔貢續

吳夢熊字子祥龍巖人寧洋恩貢生性情敦摯家居貧藉脯脩供甘旨迨父母歿居喪三年哭奠不稍衰生平閑戶潛脩邃於舉業設教州對山之麓歷四十餘年其與人交無疾言遽色人以爲孝德所推云續

張榜字勵之龍巖人性聰敏讀書務求有得不專事舉子業家貧事親孝以脩脯供甘旨鄉居無所得肉就弋者習精其技射鳥雀代之親歿輒毀其具制行端謹鄉里重之續

邱汝登字賓日號樓山龍巖人少工舉業年甫冠以文受知包公承祚包以名進士泣巖歲試拔置案首適丁父艱學使陸公按臨閱其州試諸作深爲惋惜服闋補弟子員旋食餼嘉慶甲子領鄉薦家素寒取與不苟而篤於友于脩脯所入分潤兄弟無德色初失恃時幼弟汝元甫六齡挈之里塾與同寢處教養成立元後以明經表著垂老道及乃兄提攜事猶潛然涕零生平論文深於理法遠近受業者甚衆晚就福鼎訓導未朞而卒諸生爲經紀其喪復貲助扶櫬歸里長子春榮現爲州庠生續

張丹成龍巖人故儒家子少患痘疹雙目俱瞽迨長精於星術

龍巖州志

卷十二

人物志上

三十五

每日所入悉供堂上甘旨親歿仍不自居積以所得金爲孤姪讀書費年五十始娶生二子姪天蔚現爲州庠生續

劉龍標字寸田漳平人嘉慶己未武進士藍翎侍衛授浙江衢標左協守府時衢州議脩文廟龍標極力贊成獨肩其任購材監工不辭勞苦又督脩西門外一帶河路工竣因朝京埠橋水常漲溢人多陷溺復捐俸填砌撫恤兵民恂恂有儒將風焉性至孝雖無餘俸奉母必備豐潔母未食不敢先食自居官及歸田出告反面至老不衰鄉人樂稱道之續

張崑字瑤圃

號片琳龍巖人

天姿聰敏至性過人少受業於仲兄嵐嵐

爲名諸生督課甚嚴甫弱冠與嵐同登乾隆乙卯賢書旋赴

春官薦而未第後以母年老依依膝下無意進取甲子冬會試屆期母促治裝北上不得已涕泣就道觀者爲之改容是科成進士授河南獲嘉縣令崑以母老病不能迎養遽引疾歸左右侍奉無間周旋伯仲間稟承惟謹母卒哀毀逾常年四十一無病而卒續

謝士傅龍巖人耕田爲業父早卒家貧事母甘旨無缺後母年邁輾轉牀褥起坐須扶持士傅旁設一榻衣不解帶每夜十餘起垢穢手自浣濯如是者十有餘載母年九十二始卒續

陳連雲龍巖人少失怙家貧無力娶妻業紙花供母每食必問所欲及母老寸步難移晨負母以出與家人通笑語暮乃負

龍巖州志

卷十二

人物志上

三十六

之入曰吾不忍老人輾轉牀褥間也歷十餘年無稍懈母死哀毀異常鄉鄰皆爲感動續

林太乙龍巖人少具至性一日隨母外出中途突遇一虎直搏其母乙徑奔虎相持不勝與母俱斃迄今里人猶能述其事續

文苑列傳

陳義安龍巖人永樂庚子舉人初授上安訓導以經學爲士子提倡時稱壁經始祖尋陞鳳翔教授致仕歸巖自肇創以來未有志乘義安搜採舊聞而彙輯之哀然成書自爲序見藝

文補

蘇孔機名疇以字行龍巖人正統間貢入太學授永州府同知有善政秩滿都人奏留又數年益惠於民告老歸晉階朝列大夫出俸餘糴穀置義倉以贍族黨歉歲給發秋成還倉嘗與潮守王源考訂軼事輯邑志捐資刊之祀鄉賢

陳翰誥字君錄號會堂龍巖人明嘉靖間選拔廷試第五任嘉興府訓導陞貴溪學教諭復陞貴州宣慰司教授兩院交薦題鎮遠府鎮遠縣知縣格於部議迺轉益府安東王教授王嘉稱其發揮聖學啟沃良多輔理國政忠良彌篤年七十致仕所著有經訓拾遺四卷其本留安東王處見崖別集並詩三卷間有存者卒年八十有八補

龍巖州志

卷十二

人物志上

三十七

黃文中龍巖人成化庚子舉人任交河教諭廉州教授以文行稱尤邃於易補

王命機字君奉龍巖人天啟副榜以纂史告成授通判歸家鍵戶讀書吟咏自適

連金字士勵龍巖人繼芳長子以恩貢歷官思恩府同知有循聲卒於官善詩古文所著有小草集

廖曇字雨臺龍巖人天啟辛酉舉人爲文鎔鑄經史力矯時趨尤沈邃於易

蘇憲卿字翼戴龍巖人廩膳生天才卓絕工制舉兼擅詩古文詞時督學熊公有八閩第一之目少與副使元伯柯公友善

俱年少才高以遠大自期後柯以名進士按節黔滇憲年甫壯而沒柯公哭之以詩具載蘇氏家譜所著有榕坪集以寇

亂燬

補

曾南奮字博子龍巖人順治間歲貢任永安訓導綜博洽聞講學不倦士德之順治十三年膺邑侯王公聘纂脩邑志

補

邱鎔字子陶龍巖人康熙庚申副榜正白旗教習候選知縣粵督學邀閱卷所拔多名士及歸知縣王如岳延爲義師學者宗之歲丁亥赴選入都卒於京邸

吳璉字冰涯龍巖人康熙丁卯舉人知衡山縣政尙簡靜充鄉試同考官所取士皆宿望解組歸日與諸生徒論文戶外履

龍巖州志

卷十二

人物志上

三十八

常滿工詩古文詞善楷法

吳相字長梅寧洋人康熙癸未進士選庶常散館授翰林院檢討充一統志纂脩官癸巳恩科典試浙江所得多名下士陞國子監司業尋遷翰林院侍講轉侍讀旋卒祀西湖四賢祠所著詩文各集悉佚去

補

楊道儁字彥林龍巖州庠生性醇厚父母喪祭規規焉一範於禮待羣季亦友愛喜讀書至老手不釋卷著有四書醒解綱鑑輯畧愚齋內外集等書

陳廣字居之號一山漳平居仁里人雍正丙午舉人丁未明通進士博極羣書學問文章見重於時是時鄉試房考例用近

科舉人已酉秋應聘江西同考試官漳郡聘主芝山書院講席寧化雷鉉任江南學政亦聘往共事廣受業於朱廷鴻故其學一宗朱子恆以斂華就實訓後學性峭直後因事爲人所誤咨革絕不言誣益肆力於學年七十手不釋卷下筆千言立就著一山稿續

楊際會號遇菴龍巖人受學鄉前輩廖漪園雍正癸卯選拔入都以文就正蔡尙書文勤公深相契合謂其論史諸作雅具上下千古知人論世之識爲之序以行世所著有冕山時文及冕山文集若干卷續

蔣振芳字子宇漳平縣人早歲遊庠究心經書子史及天文輿龍巖州志 卷十二 人物志上 三十九  
志等書十試棘闈不第晚乃授餼知縣查繼純屬脩邑志振芳購曾廓齋舊志與邑人士搜羅軼事續成之今漳平縣志僅有存者振芳之功居多焉續

魏廷鑑字照深號衡堂龍巖人乾隆丙午舉人學有淵源尤深風雅授肥鄉知縣邑固醇樸易理乃以造就人材爲己任月課生童獎誘備至復爲相度地理建文昌閣以象文明士民感戴捐升直隸州知州丁外艱歸尋以事謫軍臺時江右劉荆門鳳誥同在戍所晨夕唱和結文字緣未幾俱賜環閉門謝客課子姪與業外惟吟咏自娛格律步趨少陵著有衡堂小草二卷集村二卷枇解杜詩分韻八卷胞姪文卓

癸酉舉人子文元辛巳 恩科舉人 續

陳兆行字用賓號謙齋漳平人乾隆癸丑歲貢嘉慶辛酉

恩賜舉人性恬淡不苟言笑與及門講學論文終日娓娓不倦著

有謙齋詩集子廷揚乾隆壬子舉人河南汲縣知縣 續

傅育德龍巖人字泳初號果亭少穎異十歲能屬文比長好古

刀學家徒四壁安之若素以所得脩艇購書千餘卷俱手經

朱墨早歲遊庠旋食餼屢薦未售授徒四十年後進多所成

就其爲文瓣香隆萬詩擅古今體不拘拘格調著有果亭詩

集六卷 續

詹苞字鳳九龍巖人乾隆辛亥 恩貢淹通博雅詩賦尤擅場

龍巖州志 卷十二 人物志上 四十

屢躋棘闈晚授徒於鄉吟咏自適著有筠門文集詩賦各稿

刊行於世 續

謝建字杰人號斗齋龍巖州歲貢生家故貧以風節自勵好爲

詩文詞天才踔厲不拘繩尺著斗齋詩集二十卷古文二卷

已刊行其四書飲江若十卷課兒語錄一卷山林誌一卷詩

韻玉簫二卷斗齋詩話四卷俱待梓 續

陳洲字瀛山號若汀龍巖人乾隆壬子舉人性聰敏讀書別有

會心沈潛經史於先儒語錄尤能薈萃融貫爲文不拘故常

理惟其是而生氣遠出兼工詩古文詞惜年未及壯而卒著

有時文海嶼集胞弟舉人濂爲批釋刊行 續

隱逸列傳

陳備龍巖人元祐間與劉棠同里俱有詞賦聲志不混塵俗時人稱曰劉棠陳備漳南賦虎劉旣登科陳遂隱迹溪南後莫知所終祀鄉賢

蘇克善龍巖人好學篤行以孝友聞正統間王源爲潮州守奏舉克善與林洪中署揭陽程鄉學博克善以書辭曰三代尙有逸民父母旣逝毛生之檄決不敢捧遂隱居山中與邱存質蔣永迪講藍田鄉約行文公家禮及沙寇亂後都督范雄召至問計卒賴其謀平餘黨境內以安

蔣時芬號潛臯漳平縣人隱居講學絕意進取邑長李某慕其

龍巖州志

卷十二

人物志上

四十一

名欲延見之輒遯去構元石洞於里之長潭上有石壁鐫江門倒影四字蓋慕陳江門

白沙里

之風而私淑云嘗偕陳文溪

石洲談學於此賦江門詩見藝文

鄭惟忠字君佐漳平人崇禎時爲諸生甲申後隱居深山自號逸叟嘗過尺五天適諸友訂文會請爲立會規乃授筆成一剪梅詞曰人生口食最爲先勤也三饘惰也三饘口食由來命所關讀書三餐廢書三餐食飽神昏非談天飯後亦眠午後亦眠咄咄書空情可憐聚處談元散處談元三八文字會堂前日不二篇夜湊二篇見者撫掌絕倒叟默然卻坐徐置喙曰諸君戒此足矣蓋性逸而滑稽如此

補

林寶號遠峯龍巖人少隨父宦僑居吳門性聰穎喜讀書不專爲舉子業初學詩於隨園太史後與吳穀人洪稚存諸公互相酬唱年彌高所詣益進性豪宕耽麴蘖酒酣之餘縱談今古旁若無人平居則嘯歌自娛性靈獨抒真能擺脫名利以詩酒自全其天真者詩擅諸體而歌行尤勝當時有林七古之目孫源湘太史爲序其遠峯詩存行世續

謝峻字旦輝號樸園龍巖人隱於書畫書宗王右軍畫得北宋人筆意題句亦工其山中訓子圖題云老公何事太辛勤幾卷殘書訓子頻山中不爲浮雲計第願兒孫學古人尤長於畫松老幹輪囷自具拔地參天之勢南靖莊復齋副使贈以

龍巖州志 卷十二 人物志上 四十二

詩見秋水堂集中有更問醉醒時清琴彈幾曲之句續

### 義行列傳

邱存質龍巖人縣令唐某嘗署爲鄉老有疑事輒諮訪焉鄉中稱爲邱園先生沙寇亂官署被焚劫都督范雄令佐軍餉存質卽令子興輸粟一千石雄欲奏請官之固辭以子昂貴贈順天府治中其同時佐餉者有王璟翁實陳邦正鄧肅林遂各輸粟四百石皆義民也例得附書

蔣永迪字雲山龍巖人宣德三年邑中大疫死者甚衆施棺以百計沙寇之亂范都督雄召迪與蘇克善至軍前畫策寇賴以平晚年與邱存質蘇克善講行藍田鄉約及文公家禮其

子輔以賢書歷官寧國教授崇祀鄉賢

補

翁祥字文定號求古軒龍巖人正統間沙寇入巖官儲被焚燬

都督范雄勸民助餉祥偕弟實充米四百石成化間重脩學

宮復偕弟福捐貲脩葺爲費甚鉅後祥子昶以宏治歲貢爲

高邑縣令福子璵以嘉靖歲貢任奉新縣訓導

補

黃毅軒龍巖人明成化間路拾白金數鎰翼日攜待原處適里

婦陳姓者踵至遍尋不獲急欲赴水黃詰之語以故乃借貸

於人爲兒作聘禮者黃悉還之後黃子孫科名累世

補

魏果字竹庄龍巖人嘉靖間歲貢赴省試時有邑人王鏗密寄

白金四百無與知者未幾鏗故果歸訪其家人以原金還之

龍巖州志

卷十二

人物志上

四十三

事聞督學者旌焉初授無錫司訓歷遼府教授不事權貴所  
至有聲祀孝義祠

連一貫字平淵龍巖人增廣生倜儻負奇輕財好義嘗分田六

百畝以贍族人隆慶二年知縣黎紹誦申詳其事建尙義坊

表曰文正遺風以子繼芳貴封德清知縣祀鄉賢

郭大深寧洋縣人嘉靖四十年山寇殺戮鄉民積屍橫亘百里

大深目擊心恫寇平盡收其骨瘞於橘潭林立爲義塚子守

搏繼其志歲以七月十五日設祭知縣鄧于蕃以尙義旌之

後令黃夢鴻爲立父子尙義碑

黃源龍巖人貧而能施時東門街道泥濘源罄其家資及授徒

修甃採石甃道自東門外至東關下長二百七十丈積工二十餘年乃成計費白金二百有奇源初無子至是年五十生子元峯人謂積善之應

賴椿龍巖人嘉靖戊戌歲大疫椿視貧不能殮者施以棺厥後踵門告給三年無倦邑人義之

章大器龍巖人庭訓有方撫幼弟頗純摯嘗拾遺金偵其人還之後子焯元璞俱官邑宰

葉尙殷字翠崎漳平縣人有慧術敢任事以聚賢里已屬大田而編差如故重爲里民困乃詣闕奏准減除各司鋪兵役歲省通邑徭費三百餘金知縣陳某義其舉欲旌之尙殷力辭

龍巖州志

卷十二

人物志上

四十四

乃止

連鎔龍巖人懷慶府同知卓犖慷慨不營家計以族姓蕃衍無告良多迺以千金置義田贍其族人覺文正遺風去人未遠

補

蘇大盛字愨巖龍巖人樂善慕義親鄰有貧不能婚喪不能殮者慨爲貲助先居白巖社前鄉因課子讀書徙居城東以就傅捨前居屋址爲鄉義塚邑侯葉世美廉其行舉賓筵現新羅書院所收白巖社山場租穀係後裔所充亦其業也

補

連經芳字碧台龍巖人崇禎辛巳歲貢應選時次貢張士琛以年老懷金求讓經芳慨許之卻其金後任邵武訓導陞廣東

邃溪教諭告歸日手鈔先賢懿行以教子孫

蘇尙瑤字維玉龍巖人生平好善樂施以磴溪爲平寧孔道上  
下三十里併無市舍行人苦之道旁舊有觀音庵將圯瑤爲  
修理輸租一百餘斗令主持僧夏間施茶往來稱便

補

謝榮琮字肖巖龍巖人明季賦稅誅求無藝吏病催科榮琮爲  
編定戶規以糧附戶百派端謹者遞主徵收上納里人效之  
公私稱便至立嘗田脩族譜著家訓設文會皆可爲鄉里法

補

石介木龍巖人少孤隨母醮於楊繼父楊聰美失足墮水介木  
卽赴水救灘高水溜順流直下遂同死

舊列  
孝友

龍巖州志

卷十二

人物志上

四十五

陳慶齊字裔侯龍巖人庠生卓犖有摯性少負物望際鼎革之  
初衙門胥役尙沿明李科派鄉民謂之大當時平林鄉編爲  
柴戶月供柴薪二千餘擔未經革除初鄉中煙灶一百八十  
有奇流離轉徙至是只剩四十餘家供億困乏又凡遠近鄉  
民入城赴市者雖茅草細物守兵均有抽稅刻剝不堪無所  
控訴慶齊爲力陳當道悉除去未幾編審人丁有奸衿某交  
通衙蠹每丁派銀至一兩三錢慮格於慶齊先以私蔭五十  
丁賄和齊執不允遂不敢橫派胥役積恨愈深尋以巨案誣  
詳褫革發審禍幾不測久乃得白至今州人尚有能道之者

補

邱翹樵字穀之龍巖人好義樂施會龍津橋圯編木橋以濟民咸賴之歲久復圯順治丁酉知縣王有容興建石梁樵捐金五百倡助橋藉以成

陳昌期字半千龍巖人增廣生居家孝友憫宗祠久廢捐五十金首倡興建族人誦之城西羅川橋嘗爲水冲脩費不足請於官丈豁橋田糧米以資脩葺其田後爲豪強侵沒子元侯力爲清出以繼父志

蘇君弼字正伍龍巖人增生端方樂善設教蔣邦義建桂芳橋濟人晚舉四子皆遊庠

倪著字太微龍巖人庠生尙義俠嘗咬指血作書勸族人重建

龍巖州志

卷十二

人物志上

四十六

祖祠見貧不能殮者輒施以棺又爲里中請豁夫役里人立碑記之順治丁未寇警倡捐五十金輸餉上憲給匾以旌翁履亨字旭夏龍巖人庠生長厚好施族里貧乏者多周之他如施粥施棺咸無吝色

蔣位漳平人銓部時馨子入北雍工詩文所著有隨餘集任城遊集性倜儻乙酉歲饑位首倡輸粟百餘石於官以賑恤全活甚衆鄉里德之補

翁大章字紫雲龍巖人康熙壬子副榜端方好學巖士從遊者衆本房考仙遊令梁湄遭耿逆幽禁赴救甚力大中丞盛稱之仕福安教諭年八十卒於官

陳邦耀字生繼龍巖人歷官都閫性慷慨好施與康熙年間充

自置蘇坂腴田三十餘畝計租三百二十科於學宮爲先

師誕忌兩辰祭費以其餘積備脩葺之用州牧劉公夢驩爲

紀其事豎碑於學宮寢

補

楊籛字孟覺龍巖人有摯性其從祖楊翹春無後葬白鼻巖下

水蝕其柩籛見之惻然爲檢歸附葬祖墳側宗黨稱之年十

五入漳州郡庠爲諸生六十三年屢躋棘闈無衰志

倪元俊字豈凡龍巖人監生樂善好施巖之南爲往漳孔道嶺

路崎嶇遇雨泥濘行人多躓元俊傾囊金百自孟頭至嶺頂

袤十餘里悉甃以石建觀音亭於半嶺以憩焉其他助脩橋

龍巖州志

卷十二

人物志上

四十七

梁道路賑饑飯僧善心皆能隨處發見

翁崇字雲級龍巖人太學生甲子偕族兄某赴省試兄染疫不

起崇親侍疾扶襯歸迨丙子試有友人張姓遭厲疾僕先死

同寓者星散崇往視惻然爲營藥餌不治治其喪歸無德色

於其子族黨義之

邱蔚文字豹林龍巖人庠生事父母能色養侍疾衣不解帶喪

葬盡禮嘗設家塾延名師以課族人雍正丙午歲饑輸百金

運米以平糶又自煮粥一日食饑民歲己酉捐金一百五十

兩置產充龍津浮橋脩費又捐建東津木橋有司上其行於

大中丞趙公署令莊年奉文匾獎曰惠溥鄉邦

邱又元龍巖人力農爲業雍正丙午歲饑偕弟恥賓出粟數百石減價平糶時又元與同族蔚文首倡踵事者有吳訓導烜諸人境賴以安縣尹爲立碑記其事又於風交隔頂建亭一所爲行人憩焉慕義之風洵足尙矣補

楊成蔭字青苑龍巖人南靖縣學生慷慨好義州有胡巖嶺懸崖峭壁俯瞰萬丈行者危之蔭乃遍度地勢募衆於嶺腰另闢一路甃成坦途并募砌黃家嶺皮擦嶺路捐費竭鬻產以繼又嘗買地葬無嗣族人建義塚瘞遺骸鄉人躋之

翁常尊字從先龍巖人善經營凡遇族里中事能急公尙義勉力襄助人稱長者聞於知縣左峴以賓筵薦舊列鄉賓

龍巖州志

卷十二

人物志上

四十八

謝桂英龍巖人居家孝友爲鄉里推重有行人遺白金二十兩者桂英知其僕與族人拾而剖焉乃捐囊金充賞贖而還之知縣王如岳舉賓筵舊列鄉賓

章世德龍巖人乾隆壬申歲饑減價平糶以賑饑民戊寅饑復煮粥以賑州牧奇公爲詳上憲給匾以獎續

吳志謙龍巖人貢生乾隆壬申輸粟賑饑里民存活甚衆及州主於州中議賑復力爲勸輸州牧奇公給匾旌之續

林士琇龍巖人性好義乾隆癸未巖城太饑士琇於本鄉煮粥

月餘全活甚衆知州嘉謨申詳道憲贈以匾曰興仁梓里續

劉廷球龍巖人性好義捐田租十八桶爲歲科兩試諸生卷資

迄今諸生兩試不必籌卷費皆其餘澤也 續

劉朝相字端甫 漳平人同慷慨好義事關學校尤不吝傾貲雍

正間脩 文廟首先倡捐並督其役乾隆十九年倡建東山

書院醵金已盡獨捐成之山長南平進士謝遜欽患病延至

家醫治及沒經紀其喪歸延平至今延平人稱劉公長者臨

終出一篋命焚之蓋族黨借欠契書賬目也今平邑文風朝

和子孫稱盛焉 續

蕭廷鎡寧洋人性慷慨有貧乏者施與無吝色邑建青雲橋捐

自置山場杉木數百株又出白金三十兩助工橋賴以成 續

廖樹彬寧洋人庠生貧而好義寧邑西路橋梁不時水漲攔阻

龍巖州志

卷十二

人物志上

四十九

行人遂倡捐開闢新路二十餘里行人得免病涉 續

謝學進字贊淵龍巖人以勤儉起家而明於大義每逢歲歉賑

恤族貧不以多貲爲靳橋梁道路首爲倡捐迄今子孫科甲

蟬聯論者皆謂其遺澤云 續

謝之洛號疇齋龍巖人富而好施戚族中有不能婚喪者量費

飲助里西博平嶺峻而且長秋夏間行人病渴施茶於半嶺

亭中子孫沿行不廢城南孟頭六十里通漳孔道脩平險阻

坦若康莊均爲義舉 續

劉介爾龍巖人性慷慨嘉慶十二年重脩學宮充租四十八桶

爲脩費州牧徐公給匾旌獎後以脩費不敷續於鄉曾公項

內借墊其租歸鄉會公收明倫堂勒有碑記續

郭碩亭龍巖人監生慷慨好義每以春秋兩闡寒士資斧爲念  
偶有所助恨力不能遍嘗以語其子若孫曰若等後日宜無  
忘予志後家漸裕其子監生元俊孫貢生琇體其志以所置  
田一十四畝計租一百零五籮爲鄉會贖貲州牧郭公世勳  
爲立碑記其事續

段雲龍字潭波龍巖人循例授同知職少客都門操計然術性  
慷慨以龍巖在京未有專館捐所置房屋一座爲士子會試  
寓所址石頭衚衕嗣又以白金五百兩充新羅書院膏火其  
好賢慕義有足尙者續

龍巖州志

卷十二

人物志上

五十

陳奎龍巖人家貧業賈嘉慶七年往南靖貿易至適中嶺上拾  
一小行囊內貯洋銀八十餘元因坐守以待比暮有人倉皇  
至問之卽失銀人也因探囊以還其人欲剖半以謝不受奎  
時年四旬尙無嗣踰年卽舉一子續

王來丹龍巖人客於浙江之桐廬妻宋氏五十無子欲爲納妾  
丹未許也值外賈有鬻妹於其家者妻以百金買之丹歸將  
成婚新人輒垂泣詰之曰鬻妾者夫也向云兄妹僞耳堂上  
有老姑不幸雙瞽兒又在抱是以悲耳丹惻然召其夫領之  
歸且慮其更售爲請家長鄰居與立券不得再售身價勿論  
更予二十金令爲活計夫感其義遂改行自立往來若親戚

焉明年宋氏育一子時年五十一 續

郭世熟字會衷龍巖人勤儉起家生平以篤行訓子及老命子曰予迫於遲暮諸凡善舉未逮者爾其繼之若至樂亭湖洋溪背暨西山等路及彌勒溪橋觀音宮俱力捐倡脩計費不下五百餘金又以所存餘貲加擴充豫爲州中義舉其子善繼先志克光前業知其貽謀有自云 續

郭元鵬字搏海世熟之子也爲國學生樂善好義鄉里稱之會辛卯纂脩州志一切經費並解省公項不敷海詣志局以先人遺項捐助洋邊三百員又以自置西山社租田四十六桶充新羅書院以資膏火志局上其事於州牧袁公褒以匾額

龍巖州志

卷十二

人物志上

五十一

海乃歸美於親歛然不自足也既備悉生平義舉若始祖及遠近無嗣旁支各捐田畝爲祭產又充本社文砥書院鄉試謄錄銀四百員賑荒義田計租壹百貳拾桶他如乙酉歲饑及壬辰癸巳甲午連年荒歉率捐銀數百員以調族黨始終無吝色可謂勇於爲義者矣 續

邱濤字宏起龍巖人捐職州同少肄禮儀比長恢宏先業與人一本性真凡有善舉無不樂從而栽培庠塾尤不吝多貲道光辛卯歲濤子貢生襄廷以父遺命公項捐充書院膏火銀肆百員州牧袁公旌以助興文教匾額 續

章上登字仞千號瀛洲龍巖人捐職州同性端方嗜學加意文

教嘗捐租充宗族鄉會貲費居恆好施濟乏周貧凡造橋脩路諸美舉慷慨樂助無吝色遺存公項預命爲日後州中義舉屬脩州志書纂就剗及解省諸費不敷其子光泰浙江候補鹽大使適家居諸志局請捐助洋邊三百員曰此先人志也志局上其事於州牧袁公旌以積善餘慶匾額光泰子廷謨州庠生廷誥登辛卯賢書

續

陳源字蓄川龍巖人由監生捐授五品職銜孝友素著見義樂爲於文教尤兢兢致意庠塾文課悉捐租飲助道光辛卯卒子職員煥以父遺命捐充新羅書院膏火銀四百員州牧袁公旌以助興文教匾額

續

章文富字振金龍巖人捐職州同居家以孝友著生平好善樂施凡遇脩理橋路踴躍倡捐尤加意文事道光辛卯充脩州志銀叁百員又充新羅書院膏火田租計銀四百有奇州牧袁公旌以助興文教匾額孫邦達現爲州庠生

續

賴家悌字本修龍巖州貢生性聰敏工翰藻壯年銳志仕途從其姑夫謝天樛游京圖進取已念其父天望年老營生江右仲弟秉龍業儒季家標尙幼恐仲分心廢業遂決計歸代父經紀漸致饒裕而持身儉素處家庭先意承志友于更篤以族微嗇於嘗產數百年祠墳未經脩整悌承父志獨力營之收葬旁支之無嗣者並爲設產備祭時秉龍爲諸生欲其專

壹舉業於山阜靜處營造書樓顏曰裕經更築旁舍延師訓  
蒙俱極脩飭甲午夏病頗亟謂其弟曰聞州志已將付梓費  
未充也當以三百金助之歿後秉龍述其語於志局並納其  
金如數焉州牧彭公旌以義問宣昭匾額續  
蘇元光字冠輝龍巖州貢生家本寒素壯年商於湘衡間漸致  
饒裕持身儉樸綽有古風而於戚屬之困窮無告者恆加溫  
恤丙戌歲饑倡行捐賑以濟族人尤留意文事自其子廷緯  
入州庠赴省試知貧士艱於應舉以自置石粉嶺田畝載租  
八十餘石充鄉會公項助費署州柯公嘉其義舉爲樹碑焉  
續

郭文舒龍巖人監生家僅中貲而勇於慕義以新羅書院膏火  
不敷充洋銀叁百員與邱濤諸人俱勒碑以誌義舉續

陳應祿漳平人監生輕財樂義爲善於鄉脩砌橋路尤力縣西  
北路通龍巖自鹽場至舊姑嶺三十里俱崎嶇山徑北路通  
寧洋自羅溪口至茶林孟汛沿溪六十里遇雨泥濘難於着  
步南路通漳郡自黃畚鋪至三重嶺三十五里途皆險阻又  
縣北安靖鄉由新橋通大田路共五十里高山峻嶺行路維  
艱應祿捐貲脩併俱砌以石遇澗水阻隔處則築石橋接濟  
又於城北丁坂鄉沿途斲石巾間復構亭以憩行人又脩厚  
福龍垵全福三鄉等路統計脩砌衢路幾三百里築石橋二

架所費不貲兄故嫂劉氏亦爲施捨嘗恐應祿脩費不足慨然出厚貲以助閨閣中亦知好義更足多焉續

### 義勇列傳

李繼善龍巖人至正十三年山賊曾飛與其黨管得勝率強徒百餘襲縣治執達魯花赤納習主簿篤堅海牙而囚之逼取縣印改縣爲寨置其黨黃得恭爲寨主繼善倡義聚衆曾元俊等掩誅得恭剿絕其黨釋納習海牙之囚邑賴以靖雍正二年祀忠義祠

林用作龍巖人至正末流寇攻龍巖急用作倡義率衆擊滅之分帥上其功授長泰主簿以母老辭後寇復作右丞羅良授

龍巖州志

卷十二

人物志上

五十四

以百夫長亦不就隱居黃竹坑耕讀自適以壽終洪武中子瑜貴贈奉議大夫

張成顥字石川龍巖人以勇敢聞嘉靖間賊匪呂細邱赤等肆擾居民成顥先後擒賊嗣總戎俞公征潮以鄉勇從征有功授把總職龍頭寨曾東田作亂復率白土鄉兵隨海道周公討平之邑紳邱鏞等爲作平戎小傳載於家乘補

張秀岐漳平縣人嘗爲鄉練總從知縣魏文瑞剿賊文瑞遇害當事律以失護之罪責令剿賊贖死秀岐奮不顧身率衆直抵賊巢示以單弱誘賊首楊一出戰擒之副以祭文瑞事聞

授千總

舊列義行

章康生龍巖人與漳平黃得連許得章俱行伍於嘉慶四年六月十八日戍臺班滿回營在東椗外洋遇盜追捕傷亡奉

旨祀本州昭忠祠 續

林得興鄭阮龍巖人與漳平朱得生陳元鳳林元龍寧洋林焯俱行伍於乾隆五十二年十二月初六奉派剿捕臺匪在蓬

山汛打杖陣亡奉

旨入祀京都昭忠祠 續

黃雲移龍巖人少勇敢充湖北天門縣營兵大金川叛隨金大將軍往剿始至夜入賊營欲斬其渠帥誤斫隊長而還次夜復往爲賊所窺砲傷回營而死將軍給以金令歸葬併檄本

龍巖州志

卷十二

人物志上

五十五

州給其母口糧終身 續

論曰志有列傳半得之有傳者之後裔也傳之義近乎銘稱美而不稱惡此孝子孝孫之心秉筆者亦樂得之以示勸顧有其人其事卓犖可紀而前志竟未登載今此不傳後更何有哉此拾遺補缺所爲不容已也

術藝列傳 附

葉琇卿龍巖人精堪輿術龍巖學宮肇建城東旋遷於溪南宋建炎間復移東關外開禧二年琇卿擇地今所請於縣尹趙汝勉而改建焉自是文明大啟人材輩出形家以爲應學宮離明之象琇卿相度之功不可沒云

吳邦基字暢侯海澄庠生乾隆間徙居龍巖之王庄村精堪輿術博通羣說著玉函輯要三卷分天元地元人元凡羅經理氣形體及陰陽架造諸法頗爲詳備刊行於世章貢雲字芳脩龍巖人邃於星術陰陽五行醫卜等書無不討源溯流窺其蘊奧壯年浪跡雲游適元日在湘江舟中見日蝕忽大悟知張果老看宮度之謬遂自號爲番果老尋遊京師往來公卿間名宿多爲折倒著有番果老集卷帙甚夥惜無傳人蠹朽之餘惟存命理星案二卷其中附著羅經奇門脈訣諸篇自謂獨出己見非勦襲臆說康熙間僑寓都門十餘年受業者幾遍海內

林濱齊龍巖人精岐黃術審脉察證用方獨具心得每遇沈疴輒以己意療治多奇效著有醫案及內外科方書未刊行歲久蠹朽諸生林鼎槐親授其傳以行世自著脈訣金針醫學法門等書間繹其緒論而闡明之現成卷帙

蔡彈五龍巖人習軒岐業以濟人利物爲分內事視疾關切如家人居近郭延請者日相望於道應給無少留難貧不受贄遠邇稱之子履平登丁卯賢書時猶矍鑠行道不倦後以壽考終人謂爲醫德之報云

陳良瑀字德鏘龍巖人庠生工書畫楷法學歐陽行草則變化離奇令人不可思議嘗於古寺書粟中世界懸匾汀人王梅

調見而異之坐臥其下三晝夜審其用筆已乃嘆曰神技也  
壯游江浙客有工書者出一幅示云此張公瑞圖得意之筆  
瑀曰是不難索紙疾書與原幅無異客駭然曰吾所藏卽君  
筆乎瑀笑頷之大加歎服畫繪無所不通尤擅長山水  
郭宗泰字振徽號勵齋龍巖人乾隆庚子舉人工草書出入十  
七帖摹倣懷素尤神似晚年筆力益奇古偶書聯幅蓬勃之  
氣覺淋漓楮墨間藝林爭寶貴之

謝廷寶字安卿號研齋龍巖人乾隆乙卯舉人篆刻琴奕靡不通曉

書畫尤擅場書宗趙文敏趣態橫生間寫人物花鳥具有逸  
致性恬靜寡言笑曾薦春官挑取謄錄不就班銓亦置度外

龍巖州志

卷十二

人物志上

五十七

晚更喜青烏家言常攬勝峯巒林麓間丰神閒暇有肥遯風  
陳盛■字苞升龍巖人通吟咏善琴理尤工淡畫沙寇之亂奉  
母避居江右藉管城糊口時有黃筌張璪之譽晚回里門藝  
益進所繪教子一經瀛洲百老及琴棋書畫諸圖人物生趣  
宛然觀者不知爲二百餘年故紙眞傳神筆也

張烈字明華龍巖人善丹青尤工寫意乾隆間寓跡金陵值  
聖駕南巡繕畫以進得邀

睿鑒

賞給銀牌名益燥晚歲家居以琴書自娛不輕作畫獲片紙者珍如

拱璧

林巖龍巖人工淡墨山水寫人物尤蒼勁性拓落不事家人生  
產執贄求畫者不遽應嗜茶飲好事者每伺其所往要於途  
預設茶菓肆其飲啖已卽索紙淡抹濃塗皆成妙品中年出  
游所至爭購尺幅爲寶貴晚回里門豪曠如故今所遺畫遠  
近觀者皆能辨其眞贋

論曰志乘列術藝本於遷固至蔚宗則創傳方技後世正史  
俱詳載焉蓋無論書繪爲藝林韻致卽陰陽醫卜諸家動與  
造化消息相準亦且關乎生民日田豈云小道必無可觀哉  
士生斯世進苟不能顯名於當時退又不能成名於薄技不  
幾與草木同腐歟前志不列術藝茲以見聞所及而補輯之  
覽是編者亦可識其用心之所在矣

龍巖州志

卷十二

人物志上

五十八

仙照舊志

三公不知其姓氏龍巖人也相傳兄弟三人得導引脩煉之術  
父善八門遁法嘗將鄉人禦賊草木皆兵賊遂敗後人名其  
山曰將山老年結茅於節惠里人覓之輒黃霧四塞不可近  
曹四公龍巖集賢里分屬寧洋人幼有異質宋元祐間里中有神妖  
每三年社中輒以人祀之不則爲厲四公欲除之往廬山遇  
異人授以禦妖止厲之方因以竹杖乘之俄頃至其鄉風雨  
中鏗然有金戈鐵馬聲比至而妖已遁矣其餘烈猶爲厲民  
多病四公以劍擊石壁甘泉湧出取以飲病者立愈又有虎

傷人四公作符牒投社公廟勾至責之是夕虎殪於庭洪水  
漂民田四公於壩上立壇詞達上蒼令人鼓噪各以桃柳矢  
射水中少頃一巨蟒長丈餘斃浮水面紹興十年秋四公見  
白霧漫山彩虹繞室林巒振響自成步虛仙樂之音從旦至  
暮不散因呼二子曰吾夙天樞仙子以過謫人間今功滿召  
歸矣遂沐浴更衣端坐而逝比葬柩至中途風雨晦暝柩忽  
不見及晴覓至蓋竹溪蓮包山柩已入土半露既而男婦齊  
集卽沒入土時有二虎守山男婦駭散不敢封迄今數百年  
無敢營其墳履之有聲蓬蓬若虛也是爲寧洋曹氏始祖

釋照口志

龍巖州志

卷十二

人物志上

五十九

慧眞佛宋時杖錫於龍巖之天臺山

分屬寧洋

鄉人建廟祀之四方

來祈夢者屢驗

陳眞佛龍巖人少時寄居東肖社張西陵家飯牛長伴顛辟穀

烏石山中不知所終或曰尸解去今石頂有小石室州人敬

祀之爲立廟陳陂社屢顯靈異

三翁姓劉漳平縣和睦里人兄弟三人俱得佛法在西埔尸解

有眞身巖廟九龍溪一帶居民多祀之

黃佛漳平縣居仁里人又呼爲黃道得佛法尸解於碧潭後山

有眞身在和春庵近鄉建廟以祀

余佛漳平縣居仁里人得佛法往安溪縣尸解

得真祖師漳平縣人陳姓爲人誠實入鳳山落髮爲僧後至寧洋選勝於山之最高處一日忽語人曰吾將以二月二十九日火化時順治十四年也至期積薪趺坐薪上守將得傳聞疑其妄令卒持弓矢往伺其火起有難色卽射之一卒甫動惡念卽跌傷師咒之立愈及俟至將所持炷香一擲火遂發師念佛如故容貌不變觀者如堵咸驚異寧洋知縣蕭亮建室祀之教諭張玉豐題聯云分明火裏煉真身何必西方尋佛祖指點山頭開梵界休從彼岸問津梁

受五道人寧洋縣人姓羅初在福興山順治庚子三月九日火化於天臺山前孟鄉人塑像祀之

光明禪師大田縣桃源人姓鄭妻死事母至孝後爲僧入寧洋天臺山脩苦行自卜一山名天恩居久之忽語人曰觀音佛祖得真諸禪師度我吾將化也詣佛前剪髮登臺自焚而逝時順治庚子八月望日知縣蕭亮建室塑像以其骨入像腹祀之

月慧上杭人龍巖萬安里圓光山寺僧也於

國朝定鼎初闢禪林朝南海歸卽了悟覺往知來明司寇王公命璿遯跡山中與談禪甚契合贈詩云圓光古剎旁雲巔極目盪冒吃紫煙恍見如來傳大我覺天日月映無邊迨耄圓寂前十餘日詔僧徒曰此六月十七日吾師忌辰我不先十九

爲大士成道曰我不後十八日我西歸矣及期跣坐而逝其徒將肉身寘龕中三年啟視顏色如生飾以金祀之後三十年乃葬靈源塔院

論曰神仙活佛儒者弗稱而自漢以來史不絕書則固未嘗無其事也如曹四公軼事寧邑兩洋裔孫濟濟苟非確有傳信彼豈肯以荒誕之辭重誣厥祖六合以內四海以外聖人有所不知不其然哉

龍巖州志卷之十二終

龍巖州志

卷十二

人物志上

六十一